

Augsburg, 1. September 1576

An Matthias Ritter d. J.

Abschrift: Staats- und Universitätsbibliothek Hamburg, Sup. ep. 2, fol. 150r-151r (S. 283-285, Nr. 123).

S. Cum D. Stenglius, praeclarè de tua et eruditione et religione sentiens nuper ultrò mihi suam in reddendis literis operam detulisset: non committendum mihi esse duxi, ut eam ad Te scribendi occasionem praetermitterem. Etsi enim nihil scriptio magnoperè dignum habeo: tamen pro vetere nostra familiaritate et mihi iucundum est res tuas secundas audire: nec Te meas qualescunque cognoscere, molestum esse tibi arbitror. Scito igitur, me ab eo tempore, quo postremo istic tecum fui, anno 65 me ferè perpetuò adversa valetudine esse conflictatum, donec anno superiore post intolerabiles cruciatus, exectus mihi è vesica est lapis magnitudine ovi pondere duarum unciarum: Post illam carnificinam in hunc usque diem nunquam decubui: sed compluribus incommodis valetudinis perpetuò confector non sine metu et periculo veteris mali recrudescentis, sed tamen exacto iam aetatis anno 60, quicquid erit, diuturnum esse non poterit: et Deum spero in aerumnis mihi affuturum. Caetera mediocria sunt et eius modi, ut ab homine philosopho multa dissimulante, et ea quae mutari nequeunt in optimam partem accipiente ferri possint. unum illud molestum est, quod infirmitas memoriae cupiditati varia legendi meae non suffragatur: et tamen perpetua lectione (qui scopus ab ineunte aetate propositus mihi fuit: nullum alium studiorum fructum desideranti) si non multum proficio: at tempus fallo, et id consequor, ne eorum, quae antehac et legi et didici prorsus obliuiscar. Typographis autem navare operam destiti, vel ab eis potius ipse sum destitutus. Habeo enim quaedam scholastica opuscula utcunque consarcinata et fortasse studiosis adolescentulis profutura: quae Basilienses mihi remiserunt, alii aliud causati, cum antehac meae lucubrationes fuerint illis περιπάλητοι. Eadem fortunam et in familiaritatibus procerum huius urbis experior. Sed haec eò se melius habent, quod et sine proceribus et absque Typographis Dei benignitate beato mihi esse licet plura non requirenti, et eos à quibus negligor vicissim contemnenti. Habes (!) mi D. Matthia de me. Tua in optimo loco esse gaudeo: idque unum abs Te peto, ut in amicis tuis perpetuo me habere et precibus Deo commendare non dedigneris. Vale Augustae Vindelicorum. Calend[is] Septemb[ris] anno 1576.

Hiero[nymus] Wolfius.